




歲功典第八十卷

冬部彙考

易經

說卦傳

勞乎坎

疏

坎是象水之卦水行不啻晝夜所以爲勞卦又是正北方之卦斗柄指北於時爲冬冬

時萬物閉藏納受爲勞是坎爲勞卦也

書經

周官

司空掌邦土居四民時地利

蔡傳

冬官卿主國空土以居士農工商四民順天時以興地利按周禮

冬官則記考工之事與此不同蓋本闕冬官漢儒以考工記當之也

詩經

小雅四月章

冬日烈烈飄風發發

朱注烈烈猶栗烈也大呂氏曰冬日猶云冬時也

禮記

王制

天子諸侯宗廟之祭冬曰烝

陳疏曰烝者衆也冬時物成者衆也

周禮

春官

大宗伯以烝冬享先王

訂鄭鑄曰冬以備物爲主烝者物畢皆可烝於是而備物也

以賓禮親邦國冬見曰遇

訂鄭康成曰遇偶也欲其若不期偶至也

秋官

大行人掌大賓之禮及大客之儀以親諸侯冬遇以協諸侯之慮

訂鄭鑄曰冬者收藏之時慮欲

其隱故取收藏之時以協之

冬官

闕漢儒以考工記代之

訂趙氏曰先王建官始於天官掌邦治至冬官而經理之事終矣名官以

冬此其旨也

爾雅

釋天

冬爲元英

疏

冬之氣和則黑而清英

冬爲安寧

注

此亦冬之別號

易飛候

不周風用事

冬乾王不周風用事人君當興邊兵治城郭行刑斷獄訟繕宮殿

易通統圖

比陸

冬日行北方黑道曰北陸

尙書考靈耀

昴爲冬期

虛星爲秋候昴爲冬期陰氣相佐德乃不邪子助母收合子符

春秋感精符

山大霧

山冬大霧十日已上不除者山崩之候

春秋說題辭

稻含水

稻之爲言藉也稻冬含水盛其德也故稻太陰精含水漸洳乃能化也江旁多稻固其宜也

孝經鉤命決

時政

冬政不失少疾喪

素問

四氣調神大論篇

冬三月此爲閉藏

注

萬物收藏閉塞而成冬也

水冰地坼無擾乎陽

注

坼裂也陽氣收藏故不可煩擾以泄陽氣

早臥晚起必待日光

注

早臥晚起順養閉藏之氣必待日光避寒邪也

使志若伏若匿若有私意若已有得

注

若伏若匿使志無外也若有私意若已有得神氣內藏也

夫腎藏志心藏神用三若字者言冬令雖主閉藏而心腎之氣時相交合故曰私者心有所私得也

去寒就溫無泄皮膚使氣亟奪

注

去寒就溫養標陽也膚腠者陽氣之所主也夫陽氣根於至陰

發於膚表外不固密則裏氣亟起以外應故無洩皮膚之陽而使急奪其根氣也此言冬令雖主深藏而標陽更宜固密

此冬氣之應養藏之道也

注

凡此應冬氣者所以養藏氣之道也

逆之則傷腎春爲痿厥奉生者少

注

腎屬水王於冬逆冬藏之氣則傷腎腎氣傷至春爲痿厥之

病因奉生者少故也蓋肝木生於冬水主春生之氣而養筋筋失其養則爲痿生氣下逆則爲厥

玉機真藏論篇

帝曰冬脈如營何如而營岐伯曰冬脈者腎也北方水也萬物之所以合藏也故其氣來沈以搏故

曰營反此者病

注

營居也言冬氣之安居於內如萬物之所以合藏也沈而搏者沈而有石也

帝曰何如而反岐伯曰其氣來如彈石者此謂太過病在外其去如數者此謂不及病在中

注如

彈石者石而強也腎爲生氣之原數則爲虛生氣不足也

帝曰冬脈太過與不及其病皆何如岐伯曰太過則令人解脬脊脈痛而少氣不欲言其不及則令

人心懸如病饑眇中清脊中痛小腹滿小便變帝曰善

注

腎爲生氣之原而主閉藏太過則氣外

泄而根本反傷故爲懈惰少氣生陽之氣不足故脊中痛心主言而發原於腎根氣傷故不欲言

也其不及則心腎水火之氣不能交濟故令人心懸如病饑眇中脇骨之杪當兩腎之處腎之生

陽不足故眇中冷也腎合膀胱腎虛而不能施化故小便變而小腹滿也

六節藏象論篇

腎者主蟄封藏之本精之處也其華在髮其充在骨爲陰中之少陰通於冬氣

注冬令之時陽氣

封閉蟄蟲深藏腎主冬藏故爲蟄封藏之本蓋蟄乃生動之物以比生陽之氣至春一陽初生而蟄蟲復振矣腎爲水藏受五藏之精液而藏之故爲精之處也髮乃血之餘血乃精之化故其華在髮腎主骨故其充在骨也腎爲陰藏而有坎中之陽故爲陰中之少陰而通於冬氣冬主水也

診要經終論篇

九月十月陰氣始冰地氣始閉人氣在心

注收藏之氣從天而降肺屬乾金而主天爲心藏之蓋

故秋冬之氣從肺而心心而腎也少陰主冬令故先從手少陰而至於足少陰

十一月十二月冰復地氣合人氣在腎

注冰復者一陽初復也地氣合者地出之陽復歸於地而

與陰合也腎主冬藏之氣故人氣在腎

脈要精微論篇

冬日在骨蟄蟲周密君子居室

注冬令閉藏故脈沈在骨如蟄蟲之封閉如君子之居室藏而勿

出也

藏氣法時論篇

腎主冬足少陰太陽主治其日壬癸腎苦燥急食辛以潤之開湊理致津液通氣也

注

腎主冬水

之令足少陰主癸水太陽主壬水二經相爲表裏而主治其經氣壬屬陽水癸屬陰水在時主冬在日爲壬癸腎者水藏喜潤而惡燥宜食辛以潤之謂辛能開湊理使津液行而通氣故潤也

管子

幼官篇

冬行秋政霧行夏政雷行春政烝泄十二始寒盡刑十二小榆賜予十二中寒效聚十二中榆大收十二寒至靜十二大寒之陰十二大寒終三寒同事六行時節君服黑色味鹹味聽徵聲治陰氣用六數飲於黑后之井以鱗獸之火爨藏慈厚行薄純坦氣修通凡物開靜形生理器成於僂教行於鈔動靜不記行止無量戒審四時以別息異出入以兩易明養生以解固審取與以總之一會諸侯令曰非元帝之命毋有一日之師役再會諸侯令曰養孤老食常疾收孤寡三會諸侯令曰田租百取五市賦百取二關賦百取一毋乏耕織之器四會諸侯令曰修道路偕度量一稱數藪澤以時禁

發之五會諸侯令曰修春秋冬夏之常祭食天壤山川之故祀必以時六會諸侯令曰以爾壤生物共元官請四輔將以祀上帝七會諸侯令曰官處四體而無禮者流之焉莠命八會諸侯令曰立四義而無議者尙之於元官聽於三公九會諸侯令曰以爾封內之財物國之所有爲幣九會大命焉出常至千里之外二千里之內諸侯三年而朝習命二年三卿使四輔一年正月朔日令大夫來修受命三公二千里之外三千里之內諸侯五年而會至習命三年名卿請事二年大夫通吉凶十年重適入正禮義五年大夫請受變三千里之外諸侯世一至置大夫以爲延安入共受命焉此居於圖北方

四時篇

北方曰月其時曰冬其氣曰寒寒生水與血其德淳越溫怒周密其事號令修禁徙民令靜止地乃不泄斷刑致罰無赦有罪以符陰氣大寒乃至甲兵乃強五穀乃熟國家乃昌四方乃備此謂月德月掌罰罰爲寒冬行春政則泄行夏政則雷行秋政則旱是故冬三月以壬癸之日發五政一政曰論孤獨恤長老二政曰善順陰修神祀賦爵祿授備位三政曰效會計毋發山川之藏四政曰捕姦

遁得盜賊者有賞五政曰禁遷徙止流民圉分異五政苟時冬事不過所求必得所惡必伏

五行篇

睹壬子水行御天子出令命左右使人內御御其氣足則發而止其氣不足則發擗瀆盜賊數剽竹箭伐檀柘令民出獵禽獸不釋巨少而殺之所以貴天地之所閉藏也然則羽卵者不段毛胎者不臚臚婦不銷弃草木根本美七十二日而畢按擗謂遮禁也羣聚之謂其閉藏之氣不足則擗防盜賊以助其閉藏之也剽削竹箭以爲矢也伐檀柘所以爲弓也貴天地閉藏故較獵取禽以助也生氣泄殺氣藏泄盛虛藏實之驗之足不足者驗天地之氣藏也藏足者來復歸根所謂暢月是也陽氣生而止不助以殺不足者陰內疏而不窒陽外浮而不反必助陰抑陽遏使下藏閉盜賊之中漏殺草木鳥獸之外榮是爲貴藏也以殺得生殺中之生貞下之元也謂贊氣化以養元之道

睹壬子水行御天子決塞動大水王后夫人薨不然則羽卵者段毛胎者臚臚婦銷弃草木根本不美七十二日而畢也

七臣七主篇

冬無賦爵賞祿傷伐五穀冬政不禁則地氣不藏

禁藏篇

冬收五藏最萬物所以內作民也

度地篇

當冬三月天地閉藏暑雨止大寒起萬物實熟利以填塞空郊繕邊城塗郭術平度量正權衡虛牢獄實庾倉君修樂與神明相望凡一年之事畢矣舉有功賞賢罰有罪遷有司之吏而第之不利作土功之事利耗什分之七土剛不立

常以冬日順三老里有司伍長以冬賞罰使各應其賞而服其罰

輕重己篇

以秋日至始數四十六日秋盡而冬始天子服黑綰黑而靜處朝諸侯卿大夫列士循於百姓發號出令曰毋行大火毋斬大山毋塞大水毋犯天之隆天子之冬禁也

以秋日至始數九十二日天子北出九十二里而壇服黑而纁黑朝諸侯卿大夫列士號曰發繇趣山人斷伐具械器趣蒞人薪藁韋足蓄積三月之後皆以其所有易其所無謂之大通三月之蓄凡在趣耕而不耕民以不令不耕之害也宜芸而不芸百草皆存民以僅存不芸之害也宜穫而不穫風雨將作五穀以削士民零落不穫之害也宜藏而不藏霧氣陽陽宜死者生宜蟄者鳴不藏之害也張耜當弩鉋耨當劍戟穫渠當耨蓑笠當採櫓故耕械具則戰械備矣

尸子

冬爲信

冬爲信北方爲冬冬終也北伏方也是故萬物冬皆伏貴賤若一美惡不滅信之至也

漢書

律歷志

太陰者北方北伏也陽氣伏於下於時爲冬冬終也物終藏乃可稱

天文志

辰星曰北方冬水知也聽也知虧聽失逆冬令傷水氣罰見辰星

淮南子

天文訓

北方水也其帝顓頊其佐元冥執權而治冬其神爲辰星其獸元武其音羽其日壬癸

秋分四十六日而立冬草木畢死音比南呂加十五日斗指亥則小雪音比無射加十五日指壬則大雪音比應鍾加十五日指子則冬至音比黃鍾加十五日指癸則小寒音比應鍾加十五日指丑則大寒音比無射

太陰治冬則欲猛毅剛彊

時則訓

冬行春令泄行夏令旱行秋令霧

五位

北方之極自九澤窮夏晦之極北至今正之谷有凍寒積冰雪雹霜霰漂潤羣水之野顓頊元冥之

古今圖書集成
所司者萬二千里其令曰申羣禁固閉藏修障塞繕關梁禁外徙斷罰刑殺當罪閉關閭大撝客止
交游禁夜樂蚤閉晏開以塞姦人已得執之必固天節已幾刑殺無赦雖有盛尊之親斷以法度毋
行水毋發藏毋釋罪

主術訓

人君上因天時下盡地財中用人力丘陵阪險不生五穀者以樹竹木冬伐薪蒸以爲民資

汜論訓

古者民澤處復穴冬日不勝霜雪霧露聖人乃作爲之築土構木以爲宮室

春秋繁露

五行逆順篇

水者冬藏至陰也宗廟祭祀之始敬四時之祭禘祫昭穆之序天子祭天諸侯祭土閉門閭大搜索
斷刑罰執當罪飭關梁禁外徙恩及於水則醴泉出恩及介蟲則黿鼉大爲靈龜出如人君簡宗廟
不禱祀廢祭祀執法不順逆天時則病流腫水脹痿痺孔竅不通咎及於水霧氣冥冥必有大水水

爲民害

蟲則龜深藏龜龜

五行五事篇

王者無失謀然後冬氣得故謀者主冬冬陰氣始盛草木必死王者能聞事審謀慮之則不侵伐不侵伐且殺則死者不恨生者不怨冬至之後大寒降萬物藏於下於時暑爲賊故王者輔之以急斷之以事水潤下也冬行夏政則蒸行春政則雷行秋政則旱冬失政則夏草木不實霜五穀疾枯大戴禮記

千乘篇

司空司冬以制度制地事準揆山林規表衍沃畜水行衰濯浸以節四時之事治地遠近以任民力以節民食太古食壯之食攻老之事公曰功事不少而饑糧不多乎子曰太古之民秀長以壽者食也在今之民羸醜以鬻者事也太古無游民食節事時民各安其居樂其宮室服事信上下交信地移民在今之世上治不平民治不和百姓不安其居不樂其宮老疾用財壯狡用力於茲民游薄事貪食於茲民憂古者殷書爲成男成女名屬升於公門此以氣食得節作事得時勸有功夏服君

事不及暘冬服君事不及凍是故年穀不成天之饑饉道無殍者在今之世男女屬散名不升於公門此以氣食不節作事不成天之饑饉於時委民不得以疾死是故立民之居必於中國之休地因寒暑之和六畜育焉五穀宜焉辨輕重制剛柔和五味以節食時事東辟之民曰夷精以僥至於大遠有不火食者矣南辟之民曰蠻信以朴至於大遠有不火食者矣西辟之民曰戎勁以剛至於大遠有不火食者矣北辟之民曰狄肥以戾至於大遠有不火食者矣及中國之民曰五方之民有安居和味咸有實用利器知通之信令之及量地度居邑有城郭立朝市地以度邑以度民以觀安危距封後利先慮久固依固可守爲奧可久能節四時之事霜露時降方冬三月草木落庶虞藏五穀必入於倉於時有事蒸於皇祖皇考息國老六人以成冬事

晉書

律曆志

九分之二商去一以生其數四十八屬水者以爲最清物之象也冬氣和則羽聲調

梁元帝纂要